

**Uunga siunnersuut: Imigassat ilaannut Kalaallit Nunaanni sananeqarsimasunut akitsuutit pillugit Inatsisartut inatsisaata allangortinneqarnissaa pillugu Inatsisartut inatsisaat**

*Aningaasaqarnermut Nunanilu Avannarlerni suleqatigiinnermut Naalakkersuisumit saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq  
 Inatsisartunut ilaasortaq Peter Olsen, Inuit Ataqatigiit, siulittaasup tullia  
 Inatsisartunut ilaasortaq Karl Kristian Kruse, Siumut  
 Inatsisartunut ilaasortaq Henrik Fleischer, Siumut  
 Inatsisartunut ilaasortaq Múte Bourup Egede, Inuit Ataqatigiit  
 Inatsisartunut ilaasortaq Jens NapátôK', Partii Naleraq  
 Inatsisartunut ilaasortaq Randi V. Evaldsen, Demokraatit

UPA 19-imi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Inatsimmi aalajangersakkanik unioqqutitsinerit sulluunniit unioqqutitseriaraluernerilluunniit akiliisitsinermik pineqaatissiissutaasinnaanerannik erseqqissanissaq siunnersuuteqarnermi siunertaavoq. Erseqqissaanerup siunertaraa inatsimmi § 1 naapertorlugu akitsuutinik akiliinngivinnerup imaluunniit ilaannakortumik akiliinerup pinerlunneruneranik erseqqissanissaq. Pinerlunneruneranut atatillugu imigassanik ethanolilinnik inuussutissarsiornikkut imaluunniit nammineq immiorneq apeqqutaanngilaq. Ilanngullugu siunnersuutigineqarpoq imigassat Kalaallit Nunaanni immiugarineqarsimasut akitsuutaannik inatsit malillugu akilerneqarsimasussaagaluani akitsuuserneqarsimanngitsunilli tunniussisoq, pissarsisoq, paarsisoq, atuisoq, assartuisoq imaluunniit pisoq akiliisitaanermik pineqaatissinneqarsinnaasoq inatsimmi erseqqissarneqassasoq.

### **Siunnersuutip Inatsisartunit siullermeerneqarnera**

Siunnersuut siullermeerneqarami tapersorsorneqarluarpoq.

### **Tusarniaanermut akissutit**

Siunnersuut piffissami 2018-imi 24. oktobarimit 28. novembarimut tusarniaassutigineqarsimasoq Naalakkersuisut paasissutissiissutigaat. Tusarniaanermut akissutit tiguneqartut siunnersuummut nassuiaatini nassuiaatigineqarput. Tusarniaasimaneq ataatsimiititaliami annertunerusumik oqaaseqaatissaqarfigineqanngilaq.

### **Ataatsimiititaliap siunnersuummik suliarinninnera**

Inatsit malillugu akiliisitsissutit Nunatta Karsianut suli iluaqutissanngortinneqassasut siullermeerinninnermut atatillugu erseqqissaatigineqarpoq. Tamanna inatsimmi atuuttumi § 19, imm. 4-mi, inatsisissatut siunnersuutikkut matumuuna allannngortinneqanngitsumi allassimavoq.

2007-imi inatsimmut allannguummi § 1 a inatsimmut ilanngunneqarmat ataatsimiititaliamit oqaatigineqassaaq:

*”§ 1 a. Mineralvandinik, sodavandinik, limonadenik allanillu kulisyremik akoqartunik, ethanolimik akoqanngitsunik imeruersaatinik aningaasarsiuutigalugu nunami maani sananermi akitsuummik akiliineqartassaaq literimut [...] 3 kr. 50 øre”.*

Inatsimmut allannguutissatut siunnersuutip saqqummiunneqartup maanna ilusiligaanera malillugu § 1 a pineqaatissiisarnermut aalajangersakkanut ilaatinneqassanngilaq, naak § 1 (aamma 2) ilaatinneqaraluartut. Tamanna naapertuunnersoq aappassaaneerinninnissamut nalileqqullugu Naalakkersuisut ataatsimiititaliamit qinnuigineqarput, taamaattoqarsimassanngippat allannguutissatut siunnersuummik saqqummiussisoqarsinnaaqqullugu.

Kiisalu ”imaluunniit unioqqutitseriaraluartoq” inatsimmi § 19, imm. 1, nr. 2-mi ilanngunneqartoq ataatsimiititaliamit maluginiarneqarpoq. Ataatsimiititaliap paasinninnera malillugu “unioqqutitseriaraluarneq”, unioqqutitseriaraluarneq pillugu Kalaallit Nunaanni pinerluttulerinermik inatsimmi aalajangersakkani ilaareersoq. Taamaattumillu § 1 a-p siuliani taaneqartup nassatarisaanik allannguutissatut siunnersuuteqarsinnaanermi oqaasertaliunneqarsimasut ”imaluunniit unioqqutitseriaraluartoq” peerneqarnissaat isumaliutigineqarsinnaavoq.

Kiisalu angerlarsimaffinni imigassanik aalakoornartortalinnik unioqqutitsilluni imigassaliortarnermi akitsuutinik akiliuteqannginnerup, imagassaq pillugu inatsimmi angerlarsimaffinni imigassanik aalakoornartortalinnik imigassaliortarnissamik inerteqquteqarnermut tapiliullugu, inatsimmik unioqqutitsinertut pineqaatissiissutaasarnerrata erseqqissarnissaa siunnersuummi siunertaasoq ataatsimiititaliamit maluginiarneqarpoq.

Tamatuma kinguneranik imigassanik aalakoornartortalinnik angerlarsimaffimmini unioqqutitsilluni imigassaliortoq, unioqqutitsilluni angerlarsimaffimmini imigassaliaminut akitsuummik akiliinngikkuni akiliisinneqarsinnaavoq. Inatsisitigut taama inissisimaneq pineqartup paasisoortinnermik kinguneqarsinnaasumik tunniussinissaanik Europami inuit pisinnaatitaaffii pillugit isumaqatigiisummi inerteqqummut akerliunngitsoq Naalakkersuisunit nalilerneqarsimassasoq ataatsimiititaliamit ilimagineqartariaqarpoq.

### **Siunnersuutip aningaasaqarnikkut kingunerisassai**

Suliassaqarfimmi periutsit atuuttut erseqqissarneqarnerat taamaallaat pineqarmat siunnersuut aningaasaqarnikkut allaffissornikullu kinguneqassanngitsoq Naalakkersuisut paasissutissiissutigaat. Tamanna pillugu ataatsimiititaliaq annertunerusumik oqaaseqaatissaqanngilaq.

### **Ataatsimiititaliap inassuteqaatai**

Siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Hermann Berthelsen  
siulittaasoq

---

Peter Olsen  
siulittaasup tullia

---

Karl-Kristian Kruse

---

Henrik Fleischer

---

Múte Bourup Egede

---

Randi Verstergaard  
Evaldsen

---

Jens Napaattoq